

Bilsena Šahman
Zastupnica SBB BIH

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO
n/r Vlada Kantona Sarajevo; Ministarstva pravde i uprave KS
Sarajevo, 19.06.2019.godina

ZASTUPNIČKA INICIJATIVA

Da se strogo i odmah sankcionira bilo koji uvredljivi ili kompromitirajući sadržaji na portalima, a da se ograniči broj komentara čitalaca na najmanje moguću mjeru. Zadužuje se Ministarstvo pravde i uprave KS da utvrdi zakonsku regulativu koja će zadovoljiti ovu inicijativu.

Obrazloženje:

Komentari čitalaca na web portalima su preuzeli i potpuno ovladali medijskim prostorima uništavajući novinarstvo, kulturu pisanja i čitanja, stvarajući atmosferu mržnje i hipokrizije, te na taj način doprinoseći opštoj nesigurnoj atmosferi u Bosni i Hercegovini.

Dok je novina postojala samo u printanoj formi, postojalo je i povjerenje građana u novinarski članak koji je potpisan, preuzimao odgovornost za kvalitet teksta i tačnost navoda.

Upravo to povjerenje građana je zloupotrebjeno kada su na scenu stupili portali, a nakon toga i komentari čitatelja bez identifikacije. Svjedoci smo da je ovaj medijski rat prerastao u rat botova-autora tekstova plaćenih od strane pojedinaca, u cilju plasiranja odgovarajućih vijesti za političke, stranačke i individualne potrebe pojedinaca.

Komentari nisu izraz mišljenja građana, već vješto vođena kampanja od strane pojedinaca - kontrolisano usmjeravanje javnog mišljenja na način da se činjenice pogrešno interpretiraju, spinuju i javnost dovodi u zabludu.

Danas se većina portala oslanja na komentare čitatelja koji im donose veću posjećenost stranicama i veću materijalnu dobit. Što su veće uvrede i senzacija to je veća dobit vlasnicima portala.

Portal se zaklanja iza komentara čitalaca, pri tome se ograđujući da „komentari“ ne predstavljaju stavove redakcije“, iako se nalaze na istom prostoru kao i tekst. Administratori navodno uklanjaju uvredljivi sadržaj, u skladu sa svojim internim procedurama, ali na način kako i kada odgovara pojedincima.

Prostor za komentarisanje je postao poligon za izživljavanje bolesnih umova, te prerastao u masovni govor mrženje. Koristeći postulate „slobode govora“ ili „kritičko novinarstvo“, komentari se koriste za manipulisanje javnošću.

Svakodnevno se na određenim portalima nalaze razni uvredljivi komentari o javnim ličnostima koji daleko prevazilaze dimenzije dopuštenog i civiliziranog ponašanja. Svjedoci smo vrijeđanja na vjerskoj, nacionalnoj i spolnoj osnovi. Nedavno istraživanje o učešću žena u politici je pokazalo da se većina žena na odlučuje uključivati u politiku, preuzimati direktorske ili neke druge funkcije iz straha od seksističkih napada i uvreda koji se pojavljuju prilikom bilo kakvih javnih aktivnosti i s njima povezanih članaka.

Zastupnica SBB BiH u SKS

Bilsena Šahman